

# **Genesis**

1:1 – 2:4a

**Kerrngehkenh Duninhj God Bolkmarnbom  
Rowk**

**1**

<sup>1</sup>Kerrngehkenh duninhj God bolkmarnbom rowk, kaddum dja kurorre. <sup>2</sup>Wanjh minj njale bangmemarnbuyindangimeninj kurorre, dja mak bolklarrkni. Dja kunkak yiman rerrih barrkbom kukku manbu boyoy kanjdji, dja God nuye Namalngmakkaykenh, yiman kunmayorrk rerrih djahdjalrokani kaddum kore kubokehkebeb. <sup>3</sup>Wanjh God yimeng, “Mah, kumwolkayinda.” Wanjh kumwolkayindanj. <sup>4</sup>Dja God nang manbu kumwolkayindanj, nang kamak rowk. Wanjh

## *Genesis 1*

nungka welenglarlme manbu kumhwolkani dja manbu kunkak. <sup>5</sup>Dja nungka God ngeykurrmeng, manbu kumhwolkani manu wanjh ngeykurrmeng barnangarra, dja manbu kunkak, manu wanjh ngeykurrmeng kumunun. Wanjh kunkak wam, kunkabel kumwam, wanjh kunbarnangarrakudji kunu.

<sup>6</sup>God yimeng, “Mah, kunngol kumray kakurrmerren kubulkayh kore kaboyo, ba kabebbebolarlmang.” <sup>7</sup>Wanjh God marn bom kunngol dja bebbolarlmey, ngalengman manu kaboyo kanjdjikah, dja mak ngalengman manu kaboyo kaddumkah. Wanjh kundjalmekbe yimerranj. <sup>8</sup>Wanjh God welengngeykurrmeng kunngol. Wanjh kunkak wam, kunkabel kumwam, wanjh kunu kunbarnangarra bokenh.

<sup>9</sup>Wanjh God yimeng, “Mah, kukku manbu kaboyo kanjdjikah kore kungngol, wanjh bomornnamiyinda kukudji ba kamrorrebebme.” Wanjh kundjalmekbe yimerranj. <sup>10</sup>Wanjh God welengngeykurrmeng kurnorre. Dja kukku manbu bomornnamerrinj kukudji, wanjh kunu ngeykurrmeng kurrula. Wanjh God nang kamak rowk.

## *Genesis 1*

<sup>11</sup>Wanjh God yimeng, “Mah, ngalengman kurnorre ngalkemen mankolhdebubuyika, ngalengman manbu kakarrme manmim, dja ngalengman kundulk, kakarrme manbarnem manmim dorreng, manbebbebubuyika.” Wanjh kundjalmekbe yimerranj. <sup>12</sup>Ngalengman kurnorre ngalkeng mankolhdebubuyika, ngalengman manbu kakarrme manmim, manbebbebubuyika, dja ngalengman kundulk kakarrme manbarnem manmim dorreng, manbebbebubuyika. Wanjh God nang kamak rowk. <sup>13</sup>Wanjh kunkak wam, kunkabel kumwam, wanjh kunu kunbarnangarra danjbik.

<sup>14</sup>God yimeng, “Mah, manbu kabirriwolkan birrimbebmerimen kore kungolbeh ngarre kaddum, ba kabirrilarlmg barnangarra dja kumunun, kabirribukkarren munguyhmunguyh ngarre kurrung dja kudjewk, dja mak ngarre kunbarnangarrabubuyika dja mandjewkbubuyika. <sup>15</sup>Bedda kaluk birriwolka kungol ngarre kaddum ba kabirribolkwolkan kanjdji kurorre.” Wanjh kundjalmekbe yimerranj. <sup>16</sup>God marn bom mankihkimuk bokenh, manbu manwernhkimuk, manu ngalengman kawolkan kawohrnan barnangarrakenh, dja manbu

## *Genesis 1*

manwohbirleyahwurd, manu ngalengman kawolkan kawohrnau kumununkenh, dja mankokkarrng warridj kunimarnbom. <sup>17-18</sup>Wanjh God welengkurrmeng manbu kabirriwolkan, kurrmeng kore kungol ngarre kaddum ba kabirribolkwolkan kanjdji kurorre, dja mak kabenebebbewohrnan barnangarrakenh dja mak kumununkenh, dja mak kabirribebbelarlmand kore kahwolkan dja kore kunkak. Wanjh God nang kamak rowk. <sup>19</sup>Kunkak wam, dja kunkabel kumwam, wanjh kunu kunbarnangarra kunkarrngbakmeng.

<sup>20</sup>Wanjh God yimeng, “Mah, kukku worrkmiworrimen namirndewern nawu kamimbi,

## *Genesis 1*

dja mak nawern nawu welyi birriray kaddumkah kurorre kore kungol ngarre kaddum.” <sup>21</sup>Wanjh kunu God marnbom nakihkimuk djenj yiman kayime birddurrangkan, mak nadjalbubuyika rowk nawu kamimbi nawu kamirndere kukukku, benmarnbom birribebbekukbubuyika rowk, dja mak nadjalwern rowk nawu welyi benmarnbom birribebbekukbubuyika rowk. Wanjh God nang kamak rowk. <sup>22</sup>Wanjh God benmarneyimeng kunmak kunwok, yimeng, “Ngurrima nawern yaw, ngurrimirndewernworrimen, barlmirrangimen kore kukku manbowarlahbubuyika, dja mak nawu ngurriwelyi, ngurrimirndewernworrimen kore kurorre.” <sup>23</sup>Kunkak wam, kunkabel kumwam, wanjh kunu kunbarnangarra five.

<sup>24</sup>Wanjh God yimeng, “Mah, kunrorre ngalkemen bebbekukbubuyika nawu kamimbi, mayh nadjalwern, kelebuk, dja nawu kawake, dja nawu kele, birribebbekukbubuyika.” Wanjh kundjalmekbe yimerranj. <sup>25</sup>God benmarnbom mayh kukbubuyika, kele nawu birribebbekukbubuyika, kelebuk nawu birribebbekukbubuyika, dja mak nawu kawake kurorre, birribebbekukbubuyika rowk. Wanjh God nang kamak rowk.

## *Genesis 1*

26Wanjh God yimeng, “Ngarrbenmarnbu bininj, yiman ngad rerrih karriohrok, birrikukyimen yiman ngad rerrih, dja kabirrimarnewohrnna djenj nawu kare kukukku, mak nawern nawu welyi nawu kare kuwonge, dja mak mayh kelebuk, dja kurorre rowk, dja mak mayh rowk nawu kawake kurorre.”

27Wanjh God benmarnbom bininj, yiman nungka rerrih kabirriohrok. Yiman God rerrih kabirriohrok benmarnbom. Benmarnbom bininj dja daluk. 28Kaluk benmarneyimeng kunmak kunwok, yimeng, “Ngurrima nawern wurdyaw, bininj ngurrimirndewernworrime, ngurribarlmirrangimen kurorre dja ngurribolkkarrmen. Dja ngurrimarnewohrna djenj nawu kare kukukku, mak nawern welyi nawu kare kuwonge, dja mayh rowk nawu kamimbi nawu kahre kurorre.”

29Wanjh God yimeng, “Ngurrina, ngaye ngokko ngakurrmeng ngudberre bininj mankoldebubuyika rowk kakarrme manmim, manbu karri kurorre kubolkbubuyika rowk, dja mandulkbubuyika rowk kakarrme manbarnem manmim dorrengh, manmekbe rowk wanjh manme ngudberre ngurringun. 30Dja nawu mayh rowk nawu kele, dja mak nadjalwern rowk nawu welyi nawu kare

## *Genesis 2*

kuwonge, dja mak mayh rowk nawu kawake kurorre, mayh nawarlahkenh rowk nawu kamimbi, bedda wanjh ngabenmarnekurrmeng kabirringun manbu kundalk manbu mandalkkuk, dja manbu kundulk kakarrme manworrkuk.” Wanjh kundjalmekbe yimerranj. 31Wanjh God nang yehyeng rowk nawu marnbom, nang kamak duninjh. Kunkak wam, kunkabel kumwam, wanjh kunu kunbarnangarra six.

2<sup>1</sup>Kunu wanjh God yakwong rowk bu bolkmahbolkmarnbuni kaddum dja kurorre, dja mak yehyeng rowk nawu kumekbe karri. 2-3Wanjh kunbarnangarra seven God bu yakwong rowk kore durrkmihdurrrkimirri, wanjh ngehmeng. Wanjh God bu ngehmeng, dja ngokko yakwong rowk kore durrkmihdurrrkimirri bolkmahbolkmarnbuni, kunmekbekenh kunu nungka kukenhmeng kunbarnangarra seven larlmey, marnbom kunbarnangarradjamun nungan nuye. 4<sup>a</sup>Wanjh kunih kunu kayolyolme bu kaddum dja kurorre God bolkmahbolkmarnbuni.

## *Genesis 2*

2:4b – 25

### **Bininj dja Daluk nawu Beneyungkikh Duninjh**

4b-6Bu Yawey nawu God bolkmarnbom kurorre dja kaddum, minj kundulk bangmediwirrinj kurorre, dja manmim minj bangmebebmeninj, dja Yawey God minj bangmemunkewemeninj mandjewk kore kurorre, dja minj nangale mak diwirrinj bolkyilkbuyi, djalkukku kumbobebmi kurorrebeh bolkdjuhkeyi rowk. 7Wanjh Yawey nawu God kundjulg kore kurorrebeh bimarnbom bininj, biwelengkebbuhmeng nuye kunngolek kore kukeb nuye bininj, wanjh bininj mimbiminj. 8Wanjh Yawey nawu God manme dudji kore koyek kabolkngeyyo Eden, wanjh kumekbe kunu nungka bikurrmeng bininj nawu bimarnbom. 9Wanjh nungka Yawey nawu God welengmarneyimeng kundulk rowk, dangerrinj kurorrebeh, kundulk manbu bininj kanan mandulkmakkaykenh, dja mak manbu kakarrme manme manmakmak. Kumekbe kore manme dudjihdudjindi, kubulkayah, kumekbe dulksi manbu kahwon bininj kunngolek bu kamimbi munguyhmunguyh, dja mak manbadbuyika manbu kahwon kunmayali kore kunmakkenh dja kore kunwarrekenh.

## *Genesis 2*

10Mankabo balboyakbuni kore Eden, djuhkeyi manme manbu dudjihdudjindi. Kaluk bewhkah yungkikah Eden, wanjh kumekbe kunu mankabo kabolrlmilarlmirranj kabomarnburrinj kunkarrngbakmeng. 11Mankabo manbu karrokme, Pishon, wanjh manu kabalboborledme kore kunred kubolkwarlah rowk Havilah. 12Kumekbe kunred kahyo gold kunwardde nawu namakkaykenh, dja mak manjmakmak perfume yiman kunkalkkid, dja cornelians kunwardde bu kunmakmak duninjh. 13Manbadbuyika manbu kabolrlmey, manu wanjh Gihon, kabalboborledme kore kunred kubolkwarlah rowk Cush. 14Dja mak manbu mankaboberlbuyika manbu karranjbikwon, manu wanjh Tigris, manbu kabolboyakbun koyekkah kunred kubolkwarlah Asshur. Wanjh ngalengman manbu kunkarrngbakmeng kabalkabore, manu wanjh ngalengman Euphrates.

15Wanjh Yawey  
nawu God bimey bininj  
dja bikurrmeng kore  
manme dudjihdudjindi  
Eden, ba kabolkyilk bun  
dja kabolknahnhan.  
16Nungka Yawey nawu

## *Genesis 2*

God biwokrayekwong bininj, yimeng, “Ngudda kamak yingun mandjalwern manbubuyika manbarnem kore maninjmanu kundulk rowk kondah kore manme kahdudjindi. <sup>17</sup>Mandjalkudji manbu kundulk, manbu kahwon kunmayali kore kunmak dja kunwarre, yuhn yingun manmekbe manme. Bu yingun wanjh bonj yidjaldowen kundjalmekbe kunbarnangarra rerrih.”

<sup>18</sup>Wanjh Yawey nawu God yimeng, “Minj kunmak bu bininj kahdjalni nadjalkudji, dja ngamarnbun nawu kabibidyikarrme nawu kamak kabenedjarrkni.” <sup>19</sup>Nungka Yawey nawu God kurorrebeh benmarnbom mayh kukbubuyika rowk nawu kare kore kabbal, dja mak nadjalwern kukbubuyika rowk nawu welyi nawu kare kuwonge. Nungka benkang kore bininj ba kanan bu baleh kangeycurrme. Kore baleh bininj benngeycurrmi bedda rowk nawu birrimimbi, kundjalmekbe birringeyyoy. <sup>20</sup>Wanjh bininj ngeycurrmeneng rowk mayh nawu kelebuk, dja mak nawern nawu welyi nawu kare kuwonge, dja mak mayh rowk nawu kare kore kabbal. Dja bininj minj bimarnengalkemeninj nawu bibidyikarrmeninj kamak benedjarrkniwirrinj.

## *Genesis 2*

<sup>21</sup>Wanjh Yawey nawu God bikekurrmeng bininj, kerroweng duninh. Bu nungka keyohkeyoy, God mey kunkudji kumbirrkirrkmurrng kore bininjbeh biwelengmokbalhmeng. <sup>22</sup>Nungka Yawey nawu God bimarnbom daluk kore kumbirrkirrkmurrngbeh bininj, wanjh bimarnekang kore bininj. <sup>23-24</sup>Kunmekbekenh kunu bininj kabebenebawon ngalbadjan kornkumo, dja kabenebelbmerren ngalbininkobeng nuye wanjh kabenyimerran yiman naburrrkudji. Wanjh bininj welengyimeng, “Kalukburrk bebmeng nawu kumurrng wam kore ngayebeh, dja kumburrrk bu ngayebeh kumburrrk. Ngahli wanjh kangeyyo ngalbininkobeng, dja ngaleng kunu kumukmarnbuyindanj bininjbeh.” <sup>25</sup>Namekbe bininj dja ngalbininkobeng benekukworrhworrni, kaluk minj beneyemeninj.

## *Genesis 3*

3:1 – 24

### **Benewokweng God**

3<sup>1</sup>Kaluk nawu nayin namekbe wanjh djalwernhkurrehkurreni djalwernkarrebubuyikawoni, bendjalwernhyurrhkeyi rowk mayhbubuyika rowk nawu kelekeleh kore Yawey nawu God marnbom. Wanjh namekbe nawu nayin balwokdanj bidjawam daluk, yimeng, “Yiddok woymbukkih duninhj God yimeng minj ngunengun manbu manbarnem kore kahdulkdingihdi kondah kore manme kahdudjindi?” 2-3Ngalbu daluk yimeng, “Nganengun rowk manme manbu mandulkbubuyika manbu kondah kahdudjindi, mandjalkudji manbu kubulkayah kahdulkdi, God kanbenemarneyimeng, manmekbe manme minj nganengun, minj mak nganekarrme, marndi nganebaldjadowen.” 4-5Wanjh nayin kumyimeng, “Minj ngunedowen. God kaburrbun bu kundjalmekbe kunbarnangarra bu ngunengun wanjh ngunemayalidangen, nguneyimerran yiman nungka God rerrih, nguneburrbun bu kunmak dja kunwarre.” 6Wanjh ngalbu daluk dulknang, nang mandulkmakkaykenh dja nang manbarnemmak, dja ngalengman kanjdjiwi wurrmey, yimeng, “Ngadjalmang ngangun ba ngamayalidangen.”

## *Genesis 3*

Wanjh mey manmekbe manme, nguneng, wanjh bibalmarnekang nabininkobeng nawu benedjarrkni, nunganwali balnguneng. 7Bu benenguneng wanjh kunmayali benemey, beneburrbom, benekuknarrinj beneworrhworr. Wanjh benewam, benemey kunworr, benebibom benedukkarrinj.

8Wanjh bu wolewolehminj, bedda nawu bininj dja ngalbininkobeng benebekkang Yawey nawu God bu rengehrey kore manme dudjihdudjindi, kaluk benemarnewarlkkarrinj kore kurruhdurrulk. 9Wanjh Yawey nawu God bikayhmeng bininj, yimeng, “Baleh yiwan?” 10Nungka biwokmey, yimeng, “Ngaye bekkang kondah kore manme kahdudjindi dja ngakeleminj, marnewarlkkarrinj dja ngakukworrhworr.” 11God yimeng, “Nangale ngunmarneyimeng yikukworrhworr? Yiddok yinguneng manbu manme kore kurrulkbeh bu ngaye wokrayekwong marneyimeng, ‘Yawn yingun?’” 12Wanjh bininj yimeng, “Daluk ngalbu ngudda kanwong, nganedjarrkni, ngaleng wanjh nganwong manmekbe manme manmekbe kurrulkbeh, wanjh nganguneng.” 13Wanjh Yawey nawu God bidjawam ngalbu daluk, “Baleh kuhni bu yikurduyimeng?” Ngaleng yimeng, “Nayin

ngurrbenbaye kumadbundedj.”

16Wanjh God bimarneyimeng ngalbu daluk, “Ngaye kaluk ngakimukwon duninjh ke kundjak bu wurdyaw yihmerlem. Kaluk yidjakbekkan bu wurdyaw karrurkimirri bu karrangenkenh. Djamku bu baleh kakurduyime bu kunmekbe kundjak ke, dja nawu nabininkobeng yidjalmarnedjare munguyh, dja nungka ngunmarnewohrnan.”

ngankoweng nganmarnekarrebuyikawong, kunmekbekenh kunu wanjh nganganeng.”

14Wanjh Yawey nawu God bimarneyimeng namekbe nayin, yimeng, “Kuhni kunyid djalyingan ke, minj mak nawarlahkenh mayhbubuyika kelebuk dja kele, ngudda djalke kunyid yidjalkudji. Bu kunmekbe yikurduyimeng, yidjalwake kore kunjam ke munguyh. Ngudda kaluk yingun kundjulng djalmunguyh bu yihmimbi. 15Ngaye ngamarnbun ngorrewoneng bu ngunewidnarrenkenh. Ngudda ke wurdwurd dja ngaleng ngarre wurdwurd kabirribebbenjirrkerren munguyh. Ngaleng ngarre wurdwurd ngundibun kukodj ngundikodjdjubulhme, dja nguddambu

17Wanjh God bimarneyimeng nawu bininj, “Ngudda yibekkang ngalbininkobeng ke, yinguneng manmekbe manme manbarnem manmekbe kurrulkbeh, manbu ngaye wokrayekwong marneyimeng, ‘Yuwn yingun.’ Bu kunmekbe yikurduyimeng wanjh kunyid ngunmarnekarrme bu kunrorre. Bu yidjalmimbi, yingudjngarrhme bu yirrurkimirri djalmunguyh, ba bu kunrorre kangalke manme manbu ngudda ke yingunkenh. 18Wanjh kangalke kundalk dja kinj manmirrhyi, dja mak yibalwelengngun manbu kurralkwaken manrakel. 19Ngudda kaluk yirrurkimirri kunkimuk duninjh kunkebkurrngirn dorreng, ba kunu kunrorre kangalke ke manme. Kunmekbe yikurduyime munguyh, kaluk yibalwelengdurndeng

### *Genesis 3*

kukulk. Ngudda yimmarnbuyindanjbeh kukulk, kunmekbekenh kunu yiyawoyhdurndeng. Ngudda wanjh kundjulng, kaluk yiyawoyhdurndeng kundjulng.”

<sup>20</sup>Adam bingeykurrmeng ngalbininkobeng nuye Eve, dja ngaleng kunu ngalbadjan ngalkudji kadberre karriwarlahken nawu karrimimbi. <sup>21</sup>Dja Yawey nawu God mey mayh nuye kunkulah berrewoneng bininj dja ngalbininkobeng, marnbom benbenedjongbom benedjongbuyindi.

<sup>22</sup>Wanjh Yawey nawu God yimeng, “Nawu bininj yimerranj yiman ngad rerrih, kakarrme kunmayali bu kaburrbun kore kunmak dja kunwarre. Marndi mak kayawoyhbidyirriyongen kamang manbarnem kore kurruikbeh manbu kahwon bininj kunngolek bu kamimbi munguyhmunguyh, dja marndi kangun wanjh kamimbi munguyhmunguyh.” <sup>23</sup>Kunmekbekenh

### *Genesis 4*

Yawey nawu God bikukmunkeweng kore kumekbe manme dudjihdudjindi, Eden, ba kabolkyilk bun kuroorre kore nungka kummarnbuyindanjbeh. <sup>24</sup>Bu bidjirrkang nawu bininj, wanjh kumekbe benwelengkurrmeng cherubim nawu yiman mayh welyi Godbeh, kaluk koyekkah kore manme dudjihdudjindi, nawu birrimarnedurrrmirri nungan God birrimarnebolknahnani, dja nawu mandjawak yiman kunak rerrih djurruhjurrrungi djurrbohdjurrborledmi kore kumekbe bendjangnanikenh, ba minj nangale baldarnhrawinj kore kumekbe dulkdi kundulk manbu kahwon bininj kunngolek bu kamimbi munguyhmunguyh.

Genesis, Exodus 1 - 14 and 20, Ruth,  
Luke, John, Acts and Ephesians in  
Kunwinjku, Northern Territory.

492P 550

© Bible Society in Australia 1992

ISBN 0 647 12660 5